

VENDIM
Nr.49, datë 31.1.2007

**PËR SHPALLJEN E EKOSISTEMIT NATYROR TË MALIT ME GROPA-BIZË-
MARTANESH “PEIZAZH I MBROJTUR”**

Në mbështetje të nenit 100 të Kushtetutës dhe të neneve 13, pika 1, e 23 të ligjit nr.8906, datë 6.6.2002 “Për zonat e mbrojtura”, me propozimin e Ministrit të Mjedisit, Pyjeve dhe Administrimit të Ujërave, Këshilli i Ministrave

VENDOSI:

1. Shpalljen e ekosistemit natyror të Malit me Gropa-Bizë-Martanesht “Peizazh i mbrojtur”, sipas hartës, që i bashkëlidhet këtij vendimi.

2. Kufijtë e këtij peizazhi të mbrojtur janë, si më poshtë vijon:

Veri: Qafa e Murrizës (4417506,12L/4588637V), vijon me rrugën automobilistike për te Guri i Bardhë, Kroi i Ftohtë (1198,0 m), qafa e Qershisë, maja e Zabelit të Madh, te ura e Thanës, ndjek rrugën automobilistike Guri i Bardhë-Tiranë, përroin dhe grykën e Shehut, vazhdon përgjatë lumit të Matit, deri e bashkimi me përroin e Lenës, vazhdon përgjatë përroit të Lenës e të Lajthisë deri e kryqëzimi i rrugëve për këmbësorë, kuota 1 870,6 m (4441735L/4583160,58V);

Lindje: Kryqëzimi i rrugëve për këmbësorë, kuota 1870,6 m (4441735L/4583160,58V), kalon Qafën e Drerit, livadhet e Kolgrekut, vijon drejt qafës së Prevallit, te ujëvara e Zallit të Vardarit, fushat e Palemit, Rrahi i Hasramës, maja e Sadokut, shpati i Skorës, ndjek rrugën e Rinisë deri te Guri i Muzhaqit (1661,7 m) (4436149,74L/4576092,62V);

Jug: Guri i Muzhaqit (1661,7 m) (4436149,74L/4576092,62V), ndjek rrugën për këmbësorë, poshtë kuotave 1588,0 m, 1562,0 m, 1412,0 m, 1408,0 m, 1435,0 m, 1348,0 m, 1358,0 m, kurizin ujëndarës deri në majën e Sukës (1542 m) kalon në qafën e Rinasit (1538,0 m) në majën e Kësulës (1622 m), ndjek rrugën automobilistike për në Kollogjesh, në kuotën 1422 m, në qafën e Shpellzës, kuotën 1213,0 m, malin e Kol Gjergjit, qafën e Shëngjinit (1187 m), kuotën 1207 m, deri te Maja e Fagut (1443,8 m) (4420258,08L/4574326,63V);

Perëndim: Maja e Fagut (1443,8 m) (4420258, 08L/4574326,63V), ndjek përroin e Vavilëz, pranë Shëngjinit të Madh deri te ndërprerja me lumin e Erzenit, në afërsi të fshatit Burimas, dhe më pas ndjek kufirin e parkut kombëtar “Mali i Dajtit” deri në qafën e Murrizës (4417506,12L/4588637V).

3. Peizazhi i mbrojtur i Malit me Gropa-Bizë-Martanesht ka një sipërfaqe 25 266,42 ha, ku përfshihen:

- | | |
|--|---------------|
| a) Sipërfaqe pyjore, ripyllëzime, pyje të rralla,
tokë me bimësi pyjore | 18 290,37 ha; |
| b) Sipërfaqe bujqësore dhe pemëto | 1 452,92 ha; |
| c) Sipërfaqe kullosore, livadhe e me bimësi të rrallë | 5 485,60 ha; |
| ç) Sipërfaqe urbane, e përzier me tokë bujqësore,
pemëto e pyjore | 37,53 ha. |

4. Peizazhi i mbrojtur i Malit me Gropa-Bizë-Martanesht ndahet në nënzona, ruajtjeje e administrimi, si më poshtë vijon:

a) Zona qendrore, me sipërfaqe 13 752,51 ha (e shënuar në hartë me “ZQ”), përfshin habitatet, pyjore natyrore të Brozhbardhetit, Snoit të Madh e të Vogël, Bizës, Ballenjës, Martaneshit, Panjetit dhe pjesë të pyjeve të Kostenjës. Ajo përcaktohet si zonë me vlera të larta për natyrën e biodiversitetin dhe në të zbatohet shkalla e katërt e mbrojtjes, që siguron një territor të pashqetësuar dhe në përputhje me kriteret e administrimit të poligonit kombëtar.

b) Zona e përdorimit të qëndrueshëm, me sipërfaqe 3 001,11 ha (e shënuar në hartë me “ZPQ”), në të cilën lejohen veprimtaritë ekonomike, si dhe mund të ushtrohen veprimtari të reja, vetëm pasi të pajisen me lejet përkatëse. Në këtë zonë përfshihen pyjet e Fagut, ato rreth Shëngjinit të Madh, të Vërrisë, të Linosit dhe të Peshk-Lenës. Në zonën e përdorimit të qëndrueshëm të zbatohet

shkalla e katërt e mbrojtjes, në përputhje me kriteret e administrimit të poligonit kombëtar.

c) Zona e përdorimit tradicional, me sipërfaqe 7 687,82 ha (e shënuar në hartë me “ZPT”), e cila mundëson vazhdimin e veprimtarive, tradicionale dhe ekonomike. Në këtë zonë përfshihen territoret bujqësore, pyjore e kullësore, si dhe ato rreth qendrave të banuara të Malit me Gropa, Bizës dhe pjesë të Martaneshit. Në zonën e përdorimit tradicional të zbatohet shkalla e pestë e mbrojtjes mjedisore, sipas kriterëve të administrimit të poligonit kombëtar.

ç) Zona rekreative, me sipërfaqe 824,98 ha (e shënuar në hartë me “ZR”), përbën zonën me mundësi rekreative në natyrë të hapur, në përputhje me funksionet e zonës së mbrojtur, vlerat ekologjike të peizazhit natyror dhe vlerat, turistike e kulturore. Në këtë zonë përfshihen lugina e Valit, pjesë të Malit me Gropa dhe rajoni rreth teqesë së Martaneshit. Në zonën rekreative të zbatohet shkalla e katërt e mbrojtjes.

5. Ministria e Mjedisit, Pyjeve dhe Administrimit të Ujërave, Ministria e Mbrojtjes dhe ministrinë e tjera të linjës, në bashkëpunim me njësitë e qeverisjes vendore, me organet e specializuara kërkimore-shkencore, me përfaqësuesit e biznesit dhe të pronarëve privatë, hartojnë planin e menaxhimit të peizazhit të mbrojtur.

6. Ngarkohen Ministria e Punëve Publike, Transportit dhe Telekomunikacionit, Ministria e Turizmit, Kulturës, Rinisë dhe Sporteve dhe Ministria e Mbrojtjes, në bashkëpunim me ministrinë e tjera të linjës dhe njësitë e qeverisjes vendore, të kryejnë studimin urbanistik rajonal të zonës, në përputhje me synimet dhe objektivat e menaxhimit të peizazhit të mbrojtur e të administrimit të poligonit kombëtar.

7. Sipërfaqja e poligonit të Bizës të administrohet nga Ministria e Mbrojtjes.

8. Ministria e Mjedisit, Pyjeve dhe Administrimit të Ujërave, brenda strukturës së vet organizative, bashkëpunon me strukturat përkatëse të Ministrisë së Mbrojtjes për administrimin e zonës së mbrojtur.

9. Ngarkohen Ministria e Mjedisit, Pyjeve dhe Administrimit të Ujërave, Ministria e Mbrojtjes dhe njësitë e qeverisjes vendore për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI
Sali Berisha

